



Inatsisartut Inuussutissarsionermut Aatsitassanullu Ataatsimiititaliaat

Piffissaq suliffik pillugu UKA2025-mi imm. 58-imut tunngatillugu misilittakkat pillugit ilisimatitsissut

Brevdato: 03-11-2025
Sagsnr.: 2025-19461
Akt id. 25922909

Piffissap suliffiup sivikillineqarnissaa pillugu siunnersuutip UKA2025/58-ip siullermeererata kingorna Inatsisartut Inuussutissarsionermut Aatsitassanullu Ataatsimiititaliaannut suliareqqitassanngorlugu innersuunneqarpoq. Tamatumunnga tunngatillugu piffissap suliffiup aaqinneqarnissaa allaffeqarfimma isumaqatigiissutit isumaqatiginninniutigineranni misilittakkanik arlalinnik tapersiissaanga.

P. O. Box 1037
3900 Nuuk
Tel. (+299) 34 50 00
E-mail: oed@nanoq.gl
www.naalakkersuisut.gl

Piffissaq suliffik maannakkut atuuttoq

Piffissaq suliffik inatsisitigut toqqaannartumik immikkut malittarisassiorneqanngilaq. Piffissaq suliffik, feriarneq pillugu inatsimmi¹, sapaatip akunneranut ataatsimut 40 tiiminut tassa ukiumut 2.080 tiimit assigisaannut aalajangerneqartoq allaqqavoq. Tamatuma kinguneraa sapaatip akunneranut ataatsimut 40 tiiminut sivikinnerusumik sulisaraanni piffissap ilaannaatigut suliffeqartutut isigineqartarnera, tamannalu akissarsianut, erninermi ullormusianut pissutsinullu allanut tunngatillugu sulisup pisinnaatitaaffiisa allanngornerannik kinguneqarajuttarpoq. Tamatumunnga pissutaavoq isumaqatigiissutaannaangitsuni aammali inatsisini allani piffissamut suliffimmut toqqaannartumik toqqaannangitsumilluunniit innersuussisoqartarnera.

Piffissap suliffiup allanngortinnissaanut periarfissat

Piffissaq suliffik isumaqatigiissutini ataasiakkaani allanngortinneqarpat sulisut ferie atugarissaarnermilu ajunngitsorsiat allat pillugit inatsisini tamanut tunngasumik aalajangersarneqartut eqqortikkuminaatsissavaat. Peqatigitillugu, isumaqatigiissutitigut aaqiineq sulianik ingerlatsisut isumaqatigiissutillu assigiinngitsut akornanni aamma namminersortuni pisortanilu suliffeqarnermi assigiinngisititsisoqariaannaalluni suliffinni allaffissornermi suliassaqarnerunerunermik kinguneqassasoq nalilerneqarpoq.

Taamaammat isumaqatigiissutini periuseq tassaavoq piffissap suliffiup sulisut sulisitsisullu akornanni isumaqatigiissutikkut aalajangerneqartannginnera. Illuatungeriit taarsiullugu ferie pillugu inatsit piffissamut suliffimmut malitassatut atortarpaat. Taamaammat piffissap suliffiup allanngortinnissaata misissorneqarnissaanik oqallisigineqarnissaanillu siunnersuuteqartup kissaataa malittarisassionermi ferie pillugu inatsisip nutarternissaanut tunngavoq.

Piffissap suliffiup allanngortinnerani pisortani namminersortunilu suliffeqarnermut annertuumik kinguneqarsinnaammat sulisut sulisitsisullu suliameq peqataatinnissaat pingaaruteqarpoq. Taamaalilluni suliffeqarnermi namminersortut pisortallu inuussutissarsiutit immikkoortuini piffissamut suliffimmut il.il. tunngatillugu isummaminnik saqqummiillutik tapersiissaput.

¹ Feriarneq pillugu Inatsisartut inatsisaat pillugu Namminersorlutik Oqartussat nalunaarutaat nr. 12, 3. november 2021-meersoq

Paasissutissat pigineqartut

Piffissap suliffiup sivikillinissaanik kissaateqarneq pisortani sulisut peqatigiiffiinit isumaqatigiinniarsinnaatitaasunit arlaleriarluni saqqummiunneqartarnikuuvoq, kisianni pisortani immikkoortoq pillugu siusinnerusukkut misissueqqissaartoqarnikuunngilaq misileraasoqarnikuunaniluunniit. Taamaammat piffissap suliffiup allanngortinneqarsinnaanerata inuiaqatigiit aningaasaqarnerannut, suliffeqarnermut immikkoortunullu sunniutissaanik sukumiinerusumik misissuinissaq kissaatiginarpoq. Uku misissorneqarluarsinnaapput:

- Piffissaq suliffik sivikinnerusoq assersuutigalugu utoqqarnik isumaginninnermi, peqqissaanermi perorsaanermilu sulisoqarnissamik pisariaqartitsinnermut sulisunillu amerlassusiliinnermut sunik kinguneqarsinnaava,
- aningaasartuutaanerusut qanoq annertutigissappat, aamma aningaasartuutaanerusut taamaattut naligiissarniarlugit naammassisaqarsinnaassutsimut pitsannguutaasariaqassanersut ilimagineqarsinnaava.
- Inuusutissarsiutini piffissani assigiinngitsuni pissutsit allanngorarfiusuni aamma, soorlu takornariartitsinnermi, aalisarnermi sanaartornermilu pissutsit immikkut ittut pillugit nassuiaasiortoqarnissaa inassuteqaatigineqarsinnaavoq.
- Tiimit ikilisinneqartut inissinneqarfiinut assigiinngitsunut kingunissai suussappat.

Piffissap suliffik sivikinnerusoq pillugu oqallinnermi Namminersorlutik Oqartussat misilittagaat pillugit qulaani taaneqartut pillugit apeqquteqartoqaqqissappat piareersimavunga ataatsimiititaliarlu sulilluarnissaanik kissaappara.

Inussiarnersumik inuulluaqqusillunga



Múte B. Egede